

REGLUGERÐ

um breytingu á reglugerð nr. 711/1996, fyrir Lífeyrissjóð Vesturlands.

1. gr.

Grein 2.2 orðast svo:

Lífeyrissjóðurinn starfar samkvæmt lögum um skyldutryggingu lífeyrisréttinda og starfsemi lífeyrissjóða nr. 129/1997 og á grundvelli samkomulags stéttarfélaga og atvinnurekenda frá 19. maí 1969 og 12. desember 1995 og tryggir þau lágmarksréttindi sem þar greinir.

2. gr.

Eftirtalдар breytingar verða á 3. gr.:

1. Grein 3.1 orðast svo:

Sjóðfélagar skulu vera allir þeir launamenn, sem náð hafa 16 ára aldri fyrir lok næsta almanaksmánaðar og byggja starfskjör sín á kjarasamningum eftirtalinnna stéttarfélaga, sem ákvarða lágmarkskjör í viðkomandi starfsgreinum á því svæði sem samningarnir taka til eða njóta ráðningarbundinna starfskjara sem byggð eru á kjarasamningum þessara félaga:

Verkalýðsfélags Akraness,

Verkalýðsfélagsins Harðar,

Verkalýðsfélags Borgarness,

Verkalýðsfélagsins Vals,

Verkalýðsfélags Stykkishólms,

Verkalýðsfélagsins Stjörmunnar og

Verkalýðsfélags Snæfellsbæjar.

2. Við grein 3.2 bætist nýr málsl. og orðast svo:

Óheimilt er að neita manni um aðild að lífeyrissjóðnum á grundvelli heilsufars hans, aldurs, hjúskaparstöðu, fjölskyldustærðar eða kyns.

3. Við grein 3.3 bætist nýr málsl. sem orðast svo:

Sama á við um þá aðila sem ekki eru bundnir af kjarasamningum nefndra stéttarfélaga né njóta ráðningarbundinna starfskjara sem byggð eru á kjarasamningum, en óska eigi að síður eftir aðild að sjóðnum.

4. Við grein 3.5 bætist nýr málsl. sem orðast svo:

Stjórn sjóðsins er jafnframt heimilt að selja öðrum lífeyrissjóðum tryggingavernd og hafa samstarf við aðra lífeyrissjóði um einstaka þætti tryggingaverndar. Þá er stjórn sjóðsins heimilt að bjóða sjóðfélögum og öðrum aðilum samninga um viðbótartryggingavernd og séreignarsparnað í samræmi við lög nr. 129/1997.

5. Grein 3.7 orðast svo:

Þeir sem greiða til séreignardeildar eru sjóðfélagar þeirrar deildar. Um réttindi þeirra og skyldur gilda ákvæði gr. 16 og gr. 24.

6. Grein 3.8 orðast svo:

Aðild að sjóðnum fellur niður ef sjóðfélagi fær útborguð réttindi sín í einu lagi eða þau flytjast samkvæmt samskiptareglum lífeyrissjóða í annan lífeyrissjóð.

3. gr.

Eftirfarandi breytingar verða á 4. gr.:

1. Við grein 4.5 bætist nýr málsl. sem orðast svo:

Stjórn sjóðsins ræður forstöðumann endurskoðunardeildar eða semur við sjálfstætt starfandi eftirlitsaðila til að annast innra eftirlit.

2. Við grein 4.7 bætist nýr málsl. sem orðast svo:
Framkvæmdastjóra er óheimilt að taka þátt í atvinnurekstri nema að fengnu leyfi stjórnar. Um hæfi framkvæmdastjóra fer að öðru leyti eftir grein 4.3.
3. Við grein 4.7.1 bætist nýr málsl. sem orðast svo:
Stjórnarmenn, framkvæmdastjóri og aðrir starfsmenn, svo og endurskoðendur lífeyris-sjóðsins, eru bundnir þagnarskyldu um allt það sem þeir fá vitneskju um í starfi og leynt á að fara samkvæmt lögum eða eðli máls. Þagnarskylda helst þó látið sé af starfi.

4. gr.

Eftirfarandi breytingar verða á 5. gr.:

1. Gr. 5.5.2. orðast svo:
Kynning ársreiknings.
2. Gr. 5.5.3. orðast svo:
Gerð grein fyrir tryggingafræðilegri úttekt.
3. Gr. 5.5.4. orðast svo:
Gerð grein fyrir fjárfestingarstefnu sjóðsins.

5. gr.

Á eftir 5. gr. kemur ný grein sem verður 6. gr. og orðast svo og breytist töluröð annarra greina samkvæmt því:

Deildarskipting.

6.1. Sjóðurinn skiptist í tvær deildir samtryggingadeild og séreignadeild. Deildirnar eru reknar sameiginlega og skipta með sér kostnaði í hlutfalli við umfang hverrar deildar samkvæmt reglum, sem stjórn sjóðsins setur.

6. gr.

6. gr. sem verður 7. gr. orðast svo:

Reikningar og endurskoðun.

7.1. Reikningsár sjóðsins er almanaksárið. Reikningar skulu endurskoðaðir af löggiltum endurskoðanda og skal hann gerður í samræmi við lög, reglur og góða reikningsskilavenju.

7. gr.

7. gr. verður 8. gr. og eru eftirfarandi breytingar á henni:

1. Grein 8.1 orðast svo:
Stjórn lífeyrissjóðsins skal árlega láta reikna út fjárhag sjóðsins og skal niðurstaða athugunarinnar vera hluti af reikningsskilum lífeyrissjóðsins um hver áramót. Í niðurstöðu tryggingafræðilegrar athugunar skal gera grein fyrir kostnaði vegna þeirra lágmarksréttinda, sem sjóðurinn er skuldbundinn að veita, sbr. ákvæði greinar 2.2. Einnig skal gerð grein fyrir kostnaði vegna þeirra viðbótarréttinda sem sjóðurinn kann að veita umfram ofangreint lágmark. Athugun skal framkvæmd af tryggingafræðingi eða öðrum þeim sem hlotið hafa viðurkenningu Vátryggingaeftirlitsins til slíks starfs. Fyrir 1. júlí ár hvert skal senda bankaeftirliti Seðlabanka Íslands hina tryggingafræðilegu athugun.
2. Grein 8.2. orðast svo:
Hrein eign lífeyrissjóðs til greiðslu lífeyris ásamt núvirði framtíðariðgjalda, skal vera jafnhá núvirði væntanlegs lífeyris vegna þegar greiddra iðgjalda og framtíðariðgjalda. Áætlun um framtíðariðgjöld og væntanlegan lífeyri skal miðuð við sjóðfélaga á þeim tíma sem tryggingafræðileg athugun tekur mið af.

3. Grein 8.3 orðast svo:

Leiði tryggingafræðileg athugun í ljós að meira en 10% munur er á milli eignarliða og lífeyrisskuldbindinga, skv. gr. 8.2., er stjórn lífeyrissjóðsins skylt að gera nauðsynlegar breytingar á reglugerðum hans. Sama gildir ef munur samkvæmt tryggingafræðilegum athugunum á milli eignarliða og lífeyrisskuldbindinga hefur haldist meiri en 5% samfellt í fimm ár.

4. Grein 7.3. verður að grein 8.4.

5. Grein 7.4. verður að grein 8.5.

8. gr.

8. gr. verður 9. gr. og orðast svo:

Ávöxtun fjár sjóðsins.

9.1. Stjórn sjóðsins skal móta fjárfestingastefnu og ávaxta fé sjóðsins með hliðsjón af þeim kjörum sem best eru boðin á hverjum tíma með tilliti til ávöxtunar og áhættu. Lífeyrissjóði er heimilt að ávaxta fé sitt með eftirfarandi hætti:

9.1.1. Í ríkisskuldbréfum, ríkisvíxlum og skuldbréfum sem tryggð eru með ábyrgð ríkissjóðs. Verðbréf þessi skulu hafa skráð kaup- og sölugengi á skipulegum markaði, þó er heimilt að fjárfesta fyrir samtals 10% af hreinni eign sjóðsins í bréfum sem ekki eru skráð á skipulegum markaði, enda séu verðbréfin útgefin af innlendum aðilum. Með hreinni eign sjóðsins er átt við hreina eign til greiðslu lífeyris samkvæmt síðasta endurskoðaða ársuppgjöri sjóðsins.

9.1.2. Í verðbréfum bæjar- og sveitarfélaga. Verðbréf þessi skulu hafa skráð kaup- og sölugengi á skipulegum markaði, þó er heimilt að fjárfesta fyrir samtals 10% af hreinni eign sjóðsins í bréfum sem ekki eru skráð á skipulegum markaði, enda séu verðbréfin útgefin af innlendum aðilum. Heildareign sjóðsins í verðbréfum þessa flokks má ekki fara yfir 35% af hreinni eign sjóðsins.

9.1.3. Með innlánnum í bönkum og sparisjóðum.

9.1.4. Í skuldbréfum tryggðum með veði í fasteignum að hámarki 65% af metnu markaðsvirði, nema þegar um er að ræða sérhæft atvinnuhúsnæði, þá skal hámark þetta vera 35%.

9.1.5. Í verðbréfum banka, sparisjóða, lánasjóða og fjármálafyrirtækja með trausta eiginfjárstöðu, enda starfi þær samkvæmt sérstökum lögum, eða séu undir eftirliti bankaeftirlits Seðlabanka Íslands. Verðbréf þessi skulu hafa skráð kaup- og sölugengi á skipulegum markaði, þó er heimilt að fjárfesta fyrir samtals 10% af hreinni eign sjóðsins í bréfum sem ekki eru skráð á skipulegum markaði, enda séu verðbréfin útgefin af innlendum aðilum. Heildareign sjóðsins í verðbréfum þessa flokks má ekki fara yfir 35% af hreinni eign sjóðsins.

9.1.6. Í hlutabréfum. Lífeyrissjóðnum skal eigi heimilt að eiga meira en 15% af hlutafé í hverju fyrirtæki. Þetta ákvæði gildir þó ekki gagnvart eignarhlutum í félögum, sem sérstaklega eru stofnuð til að sinna sérstökum þáttum í starfsemi sjóðsins. Verðbréf þessi skulu hafa skráð kaup- og sölugengi á skipulegum markaði, þó er heimilt að fjárfesta fyrir samtals 10% af hreinni eign sjóðsins í bréfum sem ekki eru skráð á skipulegum markaði, enda séu verðbréfin útgefin af innlendum aðilum og engar hömlur lagðar á viðskipti með hlutabréfin og ársreikningur öllum aðgengilegur. Heildareign sjóðsins í verðbréfum þessa flokks má ekki fara yfir 35% af hreinni eign sjóðsins.

9.1.7. Í traustum erlendum verðbréfum, sem skráð eru á opinberum verðbréfumörkuðum í aðildarríkjum Efnahags- og framfarastofnunar Evrópu (OECD) eða í skráðum verðbréfasjóðum. Verðbréf skulu keypt fyrir milligöngu viðurkenndra verðbréfamíðlara. Þó er sjóðnum heimilt að kaupa milliliðalaust hlutdeildarskírteini í skráðum verðbréfasjóðum. Hlutfall erlendra eigna fari þó ekki umfram 40% af hreinni eign til greiðslu lífeyris.

9.1.8. Með gerð afleiðusamninga sem draga úr áhættu sjóðsins.

9.1.9. Í öðrum verðbréfum. Verðbréf þessi skulu hafa skráð kaup- og sölugengi á skipulegum markaði, þó er heimilt að fjárfesta fyrir samtals 10% af hreinni eign sjóðsins í bréfum sem ekki eru skráð á skipulegum markaði, enda séu verðbréfin útgefin af innlendum aðilum. Heildarkröfur á hendur einum aðila mega einungis vera 5%. Heildar eign sjóðsins í verðbréfum þessa flokks má ekki fara yfir 35% af hreinni eign sjóðsins.

9.2. Fjárfestingar lífeyrissjóðsins skulu miðast við, að heildarkröfur á hendur einum aðila fari ekki umfram 10% af hreinni eign sjóðsins til greiðslu lífeyris. Þessi takmörk eiga ekki við um kröfur með ríkisábyrgð. Einnig eru frekari takmarkanir við lið 9.1.9. en þar mega heildarkröfur á hendur einum aðila einungis vera 5%.

9.3. Stjórn lífeyrissjóðsins skal móta fjárfestingarstefnu, þar sem sett eru viðmið að hvaða marki skuli fjárfesta í einstökum eigum. Þar skal ennfremur koma fram markmið um dreifingu eigna, tímalengd krafna, myntsamsetningu, seljanleika eigna og aðrar þær viðmiðanir, sem stjórn sjóðsins telur að gefi gleggsta mynd af fjárhagsstöðu lífeyrissjóðsins. Á ársfundi lífeyrissjóðsins, skal stjórn sjóðsins kynna fjárfestingarstefnuna, sbr. gr. 5.5.4.

9.4. Heimilt er sjóðnum að eiga fasteign fyrir skrifstofur sínar.

9.5. Heimild til bráðabirgða.

9.5.1. Stjórn sjóðsins er heimilt að gera samning við Spöl hf. um kaup víkjandi skuldabréfa, útgefnum af Speli hf., í samræmi við viljayfirlýsingar lífeyrissjóðsins dags 16. desember 1993 og 14. janúar 1994.

9. gr.

9. gr. verður 10. gr. og eftirtaldar breytingar verða á henni:

1. Grein 10.1 orðast svo:

Iðgjöld til sjóðsins nema 10% af launum sjóðfélaga 16 ára til 70 ára, sem tilgreind eru í gr. 10.2. Sé um launþega að ræða, skiptist iðgjaldið þannig, að launþegi greiðir 4%, en launagreiðandi 6%.

2. Grein 10.2 orðast svo:

Lágmarksiðgjald samkvæmt gr. 10.1. skal reiknað af heildarfjárhæð greiddra launa og endurgjalds fyrir hvers konar vinnu, starf og þjónustu. Stofn til iðgjalds skal vera allar tegundir launa eða þóknana. Til gjaldstofns skal þó ekki telja hlunnindi sem greidd eru í fríðu, svo sem fatnað, fæði og húsnæði, eða greiðslur sem ætlaðar eru til endurgreiðslu á útlögðum kostnaði, t.d. ökutækjastyrk, dagpeningum og fæðispeningum. Nú eru laun greidd vikulega og skal þá mánaðarlegt uppgjör miðast við þær vikur, fjórar eða fimm, sem lýkur í mánuðinum.

3. Grein 10.3. orðast svo:

Iðgjaldastofn manns vegna vinnu hans við eigin atvinnurekstur eða sjálfstæða starfsemi skal vera jafnhá fjárhæð skv. 2. mgr. 1. tölul. a-liðar 7. gr. laga nr. 75/1981, um tekjuskatt og eignarskatt, sb. 59. gr. þeirra laga.

4. Við grein 10.4 bætist nýr málsl. sem orðast svo:

Launagreiðendum og sjálfstæðum atvinnurekendum ber að tilkynna lífeyrissjóðnum ef þeim ber ekki lengur að standa skil á lífeyrисиðgjaldi þar sem þeir hafa hætt starfsemi eða launþegar hafa látið af störfum.

10. gr.

12. gr. verður 13. gr. og verða eftirfarandi breytingar á henni:

1. Við grein 13.3.3 bætist nýr málsl. sem orðast svo:

Hað sjóðfélagi hins vegar öðlast rétt til framreiknings sem fallið hefur niður vegna tímabundinnar fjarveru af vinnumarkaði vegna vinnu erlendis, náms, leyfis frá störfum,

barneigna eða sambærilegra ástæðna, skal framreikningsréttur stofnast á nýjan leik eigi síðar en sex mánuðum frá því að hann hefur aftur störf og greiðslu iðgjalds til sjóðsins.

11. gr.

13. gr. verður 14. gr. og eftirtaldar breytingar verða á henni:

1. Grein 14.1 orðast svo:

Nú andast sjóðfélagi, sem naut elli- eða örorkulífeyris úr sjóðnum, eða greitt hafði iðgjald til hans a.m.k. 24 mánuði á undanfarandi 36 mánuðum og lætur eftir sig maka og á þá hinn eftirlifandi maki rétt á lífeyri úr sjóðnum.

2. Grein 14.7 orðast svo:

Ekkja eða ekill samkvæmt þessari grein telst sá eða sú sem var í hjúskap, staðfestri samvist eða óvígðri sambúð, sem öldungis mátti jafna til hjúskapar við andlátid, enda hafi fjárfélagi ekki verið slitið fyrir andlát. Með óvígðri sambúð er átt við sambúð karls og konu sem eiga sameiginlegt lögheimili, eru samvistum, eiga barn saman eða konan er þunguð eða sambúðin hefur varað samfleytt í a.m.k. tvö ár. Réttur til makalífeyris fellur niður, ef makinn gengur í hjónaband á ný eða stofnar til sambúðar, sem jafna má til hjúskapar eða stofnar til staðfestrar samvistar, en gengur aftur í gildi, ef síðara hjónabandinu eða sambúðinni er slitið án réttar til lífeyris.

12. gr.

14. gr. verður 15. gr. og verða eftirfarandi breytingar á henni:

1. másl. greinar 15.1. orðast svo.

1. Nú andast sjóðfélagi, sem greitt hefur iðgjöld til sjóðsins eða notið úr honum örorkulífeyris a.m.k. 24 mánuði á undanfarandi 36 mánuðum og eiga þá börn hans og kjörbörn, er hann lætur eftir sig og yngri eru en 18 ára, rétt á lífeyri úr sjóðnum til 18 ára aldurs.

13. gr.

Á eftir 14. gr. sem verður 15. gr. kemur ný grein sem verður 16. gr. og orðast svo og breytist töluröð annarra greina samkvæmt því.

Séreignardeild.

16.1. Séreignardeildin lítur sömu stjórn og samtryggingardeild sjóðsins.

16.2. Til séreignardeildar er heimilt að greiða það framlag, sem greitt er umfram 10% af heildarlaunum. Jafnframt getur stjórn sjóðsins heimilað, að allir einstaklingar, er leggja stund á sjálfstæða starfsemi og ekki er skylt samkvæmt lögum að greiða 10% iðgjald til annars lífeyrissjóðs geti greitt 10% af heildarlaunum sínum til deildarinnar. Þá er og stjórn sjóðsins heimilt að veita viðtöku iðgjaldi frá einstaklingum, sem uppfylla lagaskyldu sína með greiðslu í annan lífeyrissjóð, en vilja greiða viðbótariðgjald til þessa sjóðs.

16.3. Þeir sem vilja greiða til séreignardeildarinnar skulu afhenda stjórn sjóðsins skriflega beiðni og felst í henni yfirlýsing um, að þeir vilji hlíta samþykktum sjóðsins.

16.4. Stjórn sjóðsins er heimilt að fenginni skriflegri beiðni einstakra sjóðfélaga að draga af inngreiddum iðgjöldum þeirra upphæð sem svarar til iðgjalds líf- eða heilsu-tryggingar.

16.5. Færður er sérreikningur fyrir framlag hvers sjóðfélaga í séreignardeild. Á þennan reikning reiknast vextir og verðbætur og skulu þeir reiknast jafnir meðalávöxtun sjóðsins. Í árslok skal draga frá séreigninni rekstrarkostnað skv. gr. 6.1. í hlutfalli við séreignina í árslok.

16.6. Framlag í séreignardeild gefur ekki rétt til stiga eða fyrirfram ákveðins lífeyris heldur skulu greiðslur reiknast í samræmi við réttindi hvers og eins.

16.7. Sjóðfélagi sem orðinn er fullra 60 ára á rétt á að fá inneign sína greidda smám saman. Skal miðað við að innstæðan verði greidd með jöfnum árlegum greiðslum á eigi skemmri tíma en 10 árum. Sama rétt hefur sjóðfélagi, sem verður að hætta störfum vegna varanlegrar heilsubilunar, áður en hann nær 60 ára aldri.

16.8. Deyi sjóðfélagi fellur inneign hans í sjóðnum til eftirlifandi maka hans og ber að skipta með jöfnum greiðslum hluta hans á minnst 10 ár. Falli sjóðfélagi frá og skilji ekki eftir sig maka skiptist inneign sjóðfélaga eftir reglum erfðalaga um lögerfðir. Hluta barna, undir 18 ára aldri, ber að skipta með jöfnum greiðslum á 10 ár eða þau ár, sem barnið vantar í 18 ára aldur, hvort sem lengra er.

16.9. Heimilt er stjórn sjóðsins að víkja frá fyrrgreindum reglum, ef inneign sjóðfélaga er svo lítil, að árlegar greiðslur geta ekki náð eftirtöldum upphæðum:

- a. Til sjóðfélagans 125% þess árgjalds, sem hann greiddi síðast í sjóðinn.
- b. Til eftirlifandi maka 75% af árgjaldi því sem vísað er til undir a.
- c. Til hvers barns 20% af árgjaldi því sem vísað er til undir a.

Í þeim tilfellum, sem talin eru undir stafliðum a-c, má stjórn sjóðsins dreifa greiðslum á skemmri tíma en 10 ár, en þó svo, að árlegar greiðslur fari ekki fram úr þeim upphæðum, sem þar eru taldar. Með jöfnum greiðslum er hér átt við jafnar greiðslur að tiltölu við fjölda greiðsluára þannig að sjóðfélagi fái á hverju ári þann hluta af innstæðu sinni, að meðtöldum tekjum vegna hennar, sem svarar tölu þeirra ára, er eftir standa af endurgreiðslutímanum.

14. gr.

16. gr. sem verður 18. gr. orðast svo:

Endurgreiðsla iðgjalda.

18.1. Heimilt er, skv. umsókn, að endurgreiða iðgjöld til erlendra ríkisborgara, sem hverfa úr sjóðnum vegna brottflutnings úr landi, enda sé slík endurgreiðsla ekki óheimil samkvæmt milliríkjasamningum sem Ísland er aðili að, eða viðkomandi hafi verið íslenskur ríkisborgari þegar réttindin áunust. Óheimilt er að endurgreiða iðgjöld ríkisborgara annarra ríkja Evrópska efnahagssvæðisins (EES) skv. gildandi milliríkjasamningum.

18.2. Endurgreiðslufjárhæðin er tiltekið hlutfall af grundvallarfjárhæð, skv. mati tryggingafræðings á greiðsludegi, miðað við heilt ár, samkvæmt gr. 11.2., margfölduð með stigum viðkomandi sjóðfélaga, en án vaxta.

15. gr.

Eftirtaldar breytingar verða á 18 gr. sem verður 20. gr.:

Við grein 20.1. bætist nýr málsl. sem orðast svo:

Sjóðfélagi getur ákveðið að eftirlaunagreiðslur hans allt að hálfu renni til maka hans eða fyrrverandi maka, en þær falla niður við andlát sjóðfélagans. Deyi makinn eða fyrrverandi maki, sem nýtur slíkra greiðslna, hins vegar á undan sjóðfélaganum, skulu greiðslurnar allar renna til sjóðfélagans.

16. gr.

20. gr. sem verður 22. gr. orðast svo:

Málsmeðferð og gerðardómur.

22.1. Um málsmeðferð í ágreiningsmálum sjóðfélaga gagnvart lífeyrissjóðnum gilda ákvæði stjórnisýslulaga nr. 37/1993 eftir því sem við á, svo sem um birtingu ákvörðunar, rökstuðning og endurupptöku.

22.2. Vilji sjóðfélagi ekki una úrskurði sjóðstjórnar í máli, er hann hefur skotið til hennar, getur hann vísað því því til gerðardóms innan þriggja mánaða frá að tilkynnt var um úrskurðinn. Gerðardómurinn skal skipaður þremur mönnum, einum tilnefndum af sjóðfélagi, einum tilnefndum af Sambandi almennra lífeyrissjóða og oddamanni tilnefndum af bankaeftirliti Seðlabanka Íslands. Gerðardómurinn skal úrskurða í málinu á grundvelli þeirra krafna, sönnunargagna, málsástæðna og annarra upplýsinga sem lágu fyrir sjóðstjórn er hún tók ákvörðun um málið. Komi fram nýjar kröfur, sönnunargögn og málsástæður við meðferð málsins fyrir gerðardómi skal málinu vísað aftur til sjóðstjórnar til endurupptöku. Sjóðstjórn er skylt að taka málið upp að nýju til úrskurðar. Gerðardómurinn skal hafa lokið við að leggja dóm innan eins mánaðar frá því að öll gögn eru fram komin í máli. Úrskurður gerðardómsins er bindandi fyrir báða aðila. Málskostnaði skal skipt milli málsaðila eftir mati dómsins, en þó skal sjóðfélagi ekki greiða meira en 1/3 málskostnaðar. Um málsmeðferð fyrir gerðardómnum fer samkvæmt lögum um samningsbundna gerðardóma.

17. gr.

21. gr. sem verður 23. gr. orðast svo:

23.1. Bankaeftirlit Seðlabanka Íslands hefur eftirlit með starfsemi lífeyrissjóðsins í samræmi við lög nr. 129/1997.

18. gr.

Reglugerð þessi öðlast gildi 30. júní 1998.

Með vísan til laga nr. 55/1980, staðfestist reglugerð þessi hér með.

Fjármálaráðuneytinu, 24. júní 1998.

F. h. r.

Áslaug Guðjónsdóttir.

REGLUGERÐ

**um breytingu á reglugerð fyrir Rafveitu Hafnarfjarðar nr. 177
16. september 1939, með breytingu nr. 268 27. október 1969.**

1. gr.

4. mgr. 3. gr. orðist þannig:

Í rafveitunefnd eiga sæti fimm menn og fimm til vara kosnir af bæjarstjórn.

Reglugerðarbreyting þessi, sem bæjarstjórn Hafnarfjarðar hefur samþykkt, staðfestist hér með samkvæmt orkulögum nr. 58 29. apríl 1967, til þess að öðlast þegar gildi og birtist til eftirbreytni öllum sem hlut eiga að máli.

Iðnaðarráðuneytinu, 30. júní 1998.

F. h. r.

Árni Þ. Árnason.

Guðjón Axel Guðjónsson.